

UMBODSMAADUR ALPINGSIS

Pórshamri, Templarasundi 5, 150 Reykjavík
Sími: 510 6700 • Grænt nr: 800 6450 • Mynds: 510 6701
Heimasiða: www.umbodsmadur.is

Mál nr. 8225/2014.

LJÓSRITI

Reykjavík, 24. nóvember 2014.

Innanríkisráðuneytið
Sölvhólssgötu 7
101 Reykjavík.

Við athuganir mínar á kvörtunum og erindum sem mér hafa borist á síðustu misserum og varða málefni fanga hef ég veitt því athygli að í ýmsum þessara mála hefur liðið allnokkur tími frá því að viðkomandi erindi hefur verið sent til innanríkisráðuneytisins og þar til því hefur verið svarað. Ég minni i því sambandi á að ég hef t.d. haft til athugunar kvörtun sem mér barst í júlí 2013 en það mál tengdist m.a. kæru sem send hafði verið ráðuneytinu 7. júní 2013 en úrskurður vegna kærunnar var kveðinn upp 6. október sl. Á fundi sem ég átti nýverið með Guðmundi Inga Þóroddssyni, formanni Afstöðu, félags fanga á Íslandi, komu fram athugasemdir um að félaginu og föngum þætti ganga treglega að fá svör við erindum sem varða málefni fanga frá stjórnvöldum. Sjálfur nefndi Guðmundur tiltekin erindi sem hann hefði sent vegna Afstöðu og eigin mála. Um væri að ræða bæði erindi og stjórn-sýslukærur.

Í framhaldi af fundi okkar Guðmundar sendi hann mér upplýsingar um tiltekin erindi sem hann hefur sent ráðuneytinu og Fangelsismálastofnun ríkisins og hann telur að séu til marks um tafir á svörum og afgreiðslum. Ég hef af þessu tilefni ákveðið að óska eftir, sbr. 7. og 9. gr. laga nr. 85/1997, um umboðsmann Alþingis, að ráðuneytið láti mér í té upplýsingar um hvað liði svörum við neðangreindum erindum og eins og ég kem nánar að hér síðar hvort ráðuneytið hafi mótað sér einhverjar almennar viðmiðanir um afgreiðslu á erindum, þ.m.t. stjórn-sýslukærum, vegna fanga. Að höfðu samráði við Guðmund eru bæði erindi frá Afstöðu og honum persónulega tilgreind hér að neðan: Ég tek það fram að hér er aðeins spurt um þau atriði sem lúta að svörum við þessum erindum en að því marki sem efni þeirra kann að koma til athugunar hjá mér verður gerð grein fyrir því í sérstökum bréfum. Þau mál þar sem óskað er eftir upplýsingum um hvað liði svörum við erindum eru eftirfarandi:

Mál Afstöðu, félags fanga:

- Erindi sent 16. júní sl.
- Erindi sent 1. júlí sl.

- Erindi sent 4. júlí sl.
- Erindi sent 26. ágúst sl., um fæði gæsluvarðhaldsfanga.

Jafnframt er bent á erindi sem sent var 12. apríl sl., ítrekað 8. júlí sl. en svar barst frá ráðuneytinu 11. október sl. Í þessu tilviki er óskað eftir að fram komi hvað skýri þann tíma sem tók að svara erindinu.


Mál Guðmundar Inga:

- Kæra frá 31. maí sl. vegna ákvörðunar fangelsismálastofnunar frá 18. mars sl. Viðbótarupplýsingar hafi verið sendar vegna málsins til ráðuneytisins 13. ágúst sl.
- Kæra frá 12. júní sl. vegna ákvörðunar fangelsismálastofnunar. Umbeðnar viðbótarupplýsingar hafi verið sendar til ráðuneytisins 15. september sl.
- Kæra frá 23. júní sl.

Eins og ég tók fram hér að framan óska ég jafnframt eftir því að ráðuneytið veiti mér upplýsingar um hvort og þá hvaða viðmið það hefur sett um afgreiðslutíma á stjórnsýslukærum frá föngum eða erindum sem varða málefni fanga frá þeim eða aðstandendum þeirra. Í þessu sambandi hef ég i huga að þarna eiga í hlut frelsissviptir einstaklingar og það kann að hafa veruleg áhrif á hagsmuni þeirra að sem fyrst sé svarað til um og eftir atvikum skorið úr um hver séu réttindi þeirra í samskiptum við fangelsisyfirvöld. Þá verður almennt að gera ráð fyrir að fangar hafi alla jafna ekki sömu tök á að standa að málarekstri hjá stjórnvöldum og fylgja málum sínum eftir og aðrir borgarar.

Þess er óskað að umbeðnar upplýsingar berist mér eigi síðar en 15. desember nk.

Virðingarfyllst,



Tryggvi Gunnarsson.